

Na osnovu člana 17. Zakona o provođenju kontrole zakonitosti korištenja prava iz oblasti boračko-invalidske zaštite („Službene novine Federacije BiH“, broj: 82/09) i člana 67. Zakona o organizaciji organa uprave u Federaciji BiH („Službene novine Federacije BiH“, broj: 35/05), a uz saglasnost Vlade Federacije Bosne i Hercegovine, d o n o s i m

**PRAVILNIK
O FORMIRANJU I RADU REVIZORSKIH TIMOVA ZA KONTROLU I REVIZORSKOG
TIMA ZA KOORDINACIJU**

Član 1.

Ovim Pravilnikom se uređuje postupak formiranja, uslovi, sastav i rad Revizorskih timova za kontrolu i Revizorskog tima za koordinaciju.

Član 2.

U Revizorske timove za kontrolu i Revizorski tim za koordinaciju mogu biti imenovani uposlenici organa državne službe svih nivoa vlasti i druga lica, stim da su bili pripadnici Oružanih snaga Bosne i Hercegovine (Armija BiH, HVO, policija) ili da su korisnici prava iz oblasti boračko-invalidske zaštite.

Član 3.

U Revizorske timove za kontrolu i Revizorski tim za koordinaciju ne mogu biti imenovana lica koja su bila odgovorna u postupcima priznavanja statusa iz oblasti vojne obaveze.

Član 4.

Članovi Revizorskih timova za kontrolu i Revizorskog tima za koordinaciju trebaju imati visoku stručnu spremu i to Pravni fakultet sa iskustvom od minimalno tri godine u vođenju upravnih postupaka, Vojnu akademiju, Oficirsku školu i Komandno štabnu školu, Fakultet sigurnosti ili drugi fakultet društvenog ili tehničkog smjera sa iskustvom u poslovima vojnih evidencija.

Član 5.

Angažovanje državnih službenika u revizorskim timovima će biti regulisano posebnim sporazumom.

Član 6.

Nadoknada za rad u Revizorskim timovima za kontrolu i Revizorskom timu za koordinaciju će biti uređena posebnim propisom Vlade Federacije Bosne i Hercegovine, prije imenovanja revizorskih timova.

Član 7.

Uposlenici Grupe za pitanja evidencija iz oblasti vojne obaveze i Samostalni izvršioци za pitanja evidencija iz oblasti vojne obaveze (u daljem tekstu: Grupe i Samostalni izvršioци) Federalnog ministarstva za pitanja boraca i invalida odbrambeno-oslobodilačkog rata/ Federalnog ministarstva za pitanja branitelja i invalida domovinskog rata (u daljem tekstu: Federalno ministarstvo) u općinama dužni su obezbjediti prostorije i administrativno logističku podršku te ostale uslove za rad Revizorskih timova za kontrolu i Revizorskog tima za koordinaciju (prostorije, kucanje, fax, telefon i papir i dr.)

Član 8.

Revizorski tim za kontrolu vrši provjeru svih uvjerenja i dokumentacije na osnovu kojih su priznata prava po propisima iz člana 1. Zakona o provođenju kontrole zakonitosti korištenja prava iz oblasti boračko-invalidske zaštite (u daljem tekstu: Zakon).

Član 9.

Revizorski tim za kontrolu vrši ocjenu zakonitosti provedenih svih upravnih postupaka na osnovu kojih su upisane činjenice u vojno-evidenciona dokumenta i na osnovu kojih su izdata uvjerenja iz oblasti vojnih evidencija.

Član 10.

Poslovi iz člana 9. ovog Pravilnika obavljaju se provjerom i sravnjavanjem podataka iz vojnih evidencija koje su izdavale vojne jedinice, a kojima raspolaže Federalno ministarstvo, sa podacima koji se nalaze u arhivima Armije BiH, arhivima HVO-a, arhivima Ministarstva unutrašnjih poslova i uvjerenjima o neisplaćenim vojničkim plaćama.

Provjera dokumentacije koja je služila u postupku priznavanja prava na povoljnije penzionisanje vrši se sravnjavanjem podataka iz dokumentacije bivšeg Federalnog ministarstva odbrane (pasivni dosijei), podataka u Grupama/Samostalnih izvršilaca i nadležnih arhiva.

Član 11.

Za obavljanje poslova revizije obrazuje se petnaest Revizorskih timova za kontrolu.

Jedan revizorski tim ima 4 člana od čega su obavezno najmanje dva člana diplomirani pravnici, po komponentama.

Član 12.

Revizorski tim za kontrolu imenuje rješenjem federalni ministar na usaglašen prijedlog kantonalnih ministara za pitanja boraca/direktora uprava za pitanja boraca i koordinacije udruženja branilaca.

U rad revizorskih timova će biti uključeni i predstavnici korisnika prava iz oblasti branilačke zaštite.

Revizorski tim će biti imenovan na paritetnoj osnovi komponenti Armije RBiH i HVO-a.

Član 13.

Plan rada Revizorskih timova za kontrolu donosi, na prijedlog revizorskog tima za koordinaciju, federalni ministar.

Za realizaciju planova rada Revizorski timovi za kontrolu su odgovorni federalnom ministru.

Član 14.

Kontrolu evidencije, dokumentacije i uvjerenja Revizorski tim za kontrolu će vršiti ličnim uvidom, neposredno.

Revizorski tim za kontrolu će poslove iz svoje nadležnosti raditi, u pravilu, u punom sastavu.

Odluku o svakom pregledanom predmetu moraju donijeti svi članovi zajedno.

Izuzetno, Revizorski tim za kontrolu može raditi i punovažno odlučivati bez prisustva jednog člana, s tim da odsutni član nije diplomirani pravnik.

Član 15.

Revizorski timovi za kontrolu i Revizorski timovi za koordinaciju formiraju spis o kontroli u svakom pojedinačnom slučaju, po imenu korisnika prava.

U spisu se nalaze zapisnici o svim kontrolama, provjerama i sravnjavanjima i datim konačnim ocjenama, te sva dokumentacija (originali, kopije ili prepisi) koju revizorski timovi pribave u postupku revizije.

Nakon obavljenih svih kontrola i donesene konačne odluke Revizorski timovi za kontrolu i Revizorski timovi za koordinaciju su dužni predati spise predmeta Federalnom ministarstvu radi daljnjeg postupanja.

Član 16.

Revizorski timovi će o svakom pregledanom predmetu sačiniti zapisnik, koji obavezno sadrži nalog organu uprave kod kojeg se vrši kontrola (član 6. st. 4,5,7,8 Zakona).

Zapisnik iz prethodnog stava obavezno potpisuju članovi Revizorskog tima za kontrolu/Revizorskog tima za koordinaciju i predstavnik pravnog subjekta kod koga je izvršena kontrola ili sravnjavanje podataka, a isti ima snagu javne isprave.

Jedan primjerak zapisnika obavezno se predaje predstavniku pravnog subjekta kod kojeg je izvršena kontrola.

U slučaju da predstavnik pravnog subjekta kod koga je izvršena kontrola odbije potpisati zapisnik ta činjenica će biti konstatovana zapisnikom.

Član 17.

U slučaju iz člana 2. stav 3. Zakona, kada Revizorski tim za kontrolu, vršeći provjeru i sravnjavanje podataka iz vojnih evidencija, utvrdi da u konkretnom slučaju nema original uvjerenja o neisplaćenim vojničkim plaćama, dužan je provesti dodatna provjeravanja načina priznanja prava i to u roku od 30 dana od dana vršenja prve kontrole konkretnog predmeta.

Član 18.

Revizorski tim za kontrolu će izvještaj o radu dostavljati sedmično Revizorskom timu za koordinaciju, te kantonalnim ministrima za pitanja boraca/direktorima uprava za pitanja boraca.

Sedmični izvještaj timu za koordinaciju u prilogu treba da ima kopije svih zapisnika o konkretnim pregledima.

Član 19.

U cilju provođenja revizije Federalni zavod za penzijsko i invalidsko osiguranje/mirovinsko i invalidsko osiguranje (u daljem tekstu: Federalni zavod PIO/MIO) osigurat će Revizorskom timu za kontrolu/ Revizorskom timu za koordinaciju uvid u sve evidencije i dokumentaciju ili izvještaj iz evidencija i dokumentacije bivšeg Federalnog ministarstva odbrane, koja je služila kao osnov ostvarivanja prava po propisima iz člana 1. Zakona.

Saradnja Ministarstva odbrane Bosne i Hercegovine sa Federalnim ministarstvom u poslovima revizije obavljat će se u skladu sa članom 14. Zakona.

U slučaju da revizorski timovi utvrde povrede propisa u postupku priznavanja prava na povoljnije penzionisanje, dužni su sačiniti detaljan zapisnik i isti dostaviti Federalnom zavodu PIO/MIO, preko kantonalnih službi.

Član 20.

Revizorski tim za koordinaciju imenuje rješenjem, Predsjednica Federacije Bosne i Hercegovine uz konsultaciju sa dopredsjednicima Federacije Bosne i Hercegovine, a na usaglašen prijedlog federalnog ministra, kantonalnih ministara/direktora uprava za pitanja boraca poštujući nacionalni paritet, po komponentama.

Član 21.

Revizorski tim za koordinaciju ima osam članova.

Član 22.

Revizorski tim za koordinaciju će donijeti Poslovnik o radu.

Član 23.

Revizorski tim za koordinaciju će vršiti koordinaciju, nadzor i praćenje rada Revizorskih timova za kontrolu.

Revizorski tim za koordinaciju je, za poslove iz svoje nadležnosti, odgovoran Predsjednici Federacije Bosne i Hercegovine i federalnom ministru.

Član 24.

U okviru nadzora, Revizorski tim za koordinaciju će vršiti kontrolu rada Revizorskih timova za kontrolu po sistemu slučajnog uzorka o čemu će sačiniti zapisnik.

U cilju obavljanja poslova iz prethodnog stava Revizorski timovi za kontrolu će obezbjediti uvid u svoj formirani spis, a kod završenih i arhiviranih predmeta kontrole spis predmeta će Revizorskom timu za koordinaciju obezbjediti Federalno ministarstvo-Sektor za normativno pravne i opće poslove.

U svim slučajevima kada Revizorski tim za kontrolu ne utvrdi zajednički stav i ne donese jedinstvenu odluku, konačnu odluku donosi Revizorski tim za koordinaciju.

U slučajevima iz prethodnog stava Revizorski tim za kontrolu je dužan izvještaj sa izdvojenim mišljenjima predati Revizorskom timu za koordinaciju.

Revizorski tim za koordinaciju o razmatranju/ekspertizi i donošenju odluke iz prethodnog stava ovog Pravilnika sačinit će zapisnik.

Član 25.

Revizorski tim za koordinaciju je dužan mjesečno dostaviti izvještaj o svom radu i radu Revizorskih timova za kontrolu federalnom ministru i Predsjednici Federacije Bosne i Hercegovine.

Član 26.

Federalno ministarstvo će tromjesečno dostavljati Vladi Federacije BiH informaciju o postignutom rezultatu revizije.

Član 27.

Revizorski timovi za kontrolu i Revizorski tim za koordinaciju mogu, preko Sektora za normativno pravne i opće poslove Federalnog ministarstva, od nadležnih institucija tražiti stručna mišljenja i ocjene u postupku provjere i sravnjavanja podataka, evidencija, dokumentacija i uvjerenja potrebnih za ostvarivanje prava iz oblasti branilačko-invalidske zaštite i povoljnijeg penzionisanja.

Član 28.

Ovaj Pravilnik stupa na snagu narednog dana od dana objavljivanja u „Službenim novinama Federacije Bosne i Hercegovine“.

MINISTAR

Zahid Crnkić

Broj:05-41-326/10
Sarajevo,20.01.2010.godine

Na ovaj pravilnik Vlada Federacije Bosne i Hercegovine dala je saglasnost aktom V. broj 128/2010 od 08.03.2010.godine.